

Skólareglur Holtaskóla



Í Holtaskóla:

- hafa allir það að meginmarkmiði að starfa í anda einkunnarorða skólans: Virðing, ábyrgð, virkni og ánægja (VÁVÁ).
- fara nemendur eftir fyrirmælum alls starfsfólks.
- sýna nemendur ábyrgð og virkni og leggja sig fram við nám og störf.
- bera nemendur ábyrgð á eigum sínum og umgengni.
- er einelti og annað ofbeldi aldrei liðið.
- taka allir ábyrgð á orðum sínum og gerðum.
- koma allir ávallt fram af ábyrgð og bera virðingu fyrir sér og umhverfi sínu.

Ástundun og stundvísi

Í Holtaskóla komum við stundvíslega í skólann, í allar kennslustundir með nauðsynleg gögn. Forráðamenn tilkynna skólanum um veikindi og fjarvistir daglega. Ef forráðamenn óska eftir leyfi lengur en tvo skóladaga, þarf að sækja um það á heimasíðu skólans. Í verklagsreglum um ástundun, koma fram skráningarreglur sem gilda í skólanum en þær eru birtar á heimasíðu skólans. Unnið er eftir verklagsreglum Fræðsluskrifstofu Reykjanesbæjar vegna ófullnægjandi skólasóknar og tilkynnt um óviðunandi skólasókn til barnaverndar samkvæmt verklagsreglunum og grunnskólalögum.

Umgengni og öryggi

Í Holtaskóla

- sýnum við ábyrgð og göngum því vel um eigur okkar og annarra.
- notum við ekki snjalltæki í skólanum nema með leyfi starfsmanna.
- gilda sérstakar reglur um umgengni og notkun tækja sem nemendur fá til afnota frá skólanum.
- gilda ákvæði persónuverndarlaga um mynd- og hljóðupptökur og birtingu þeirra. Starfsmenn geta gefið sérstakt leyfi ef upptaka er gerð í námslegum tilgangi.
- bera allir virðingu fyrir umgengnisvenjum og setja útiföt og skófátnað í skógeymslur og fatahengi.

- sýnum við ábyrgð og yfirgefum ekki skólalóðina á skólatíma, nema með sérstöku leyfi starfsmanna. Yfirgefi nemendur í 8. – 10. bekk skólalóðina á skólatíma, þá eru þeir á eigin ábyrgð og foreldra.
- höfum ekki meðferðis eldfæri eða vopn í skólann.
- veita reiðhjól, hjólabretti, hlaupahjól, vélhjól og önnur farartæki okkur ánægju ef við notum þau með ábyrgum hætti. Nemendum er heimilt að ferðast á slíkum farartækjum í og úr skóla. Farartækin eru geymd þess á milli í sérstökum grindum fyrir framan aðalinngang. Yngri börnum en 16 ára ber ávallt skylda til að nota hjóltreihjálma, samkvæmt 79. gr. umferðarlaga nr. 77 frá 2019.

Heilbrigði og hollusta

Í Holtaskóla

- hugsum við vel um heilsu okkar og lífshætti.
- komum við með hollt og gott nesti í skólann og neytum ekki sælgætis, gosdrykkja/orkudrykkja, nema með sérstöku leyfi starfsmanna.
- eru tóbaksreykingar, rafrettur, áfengi, munntóbak/púðar og aðrir vímugjafar stranglega bannaðir.

Viðbrögð og viðurlög

Viðurlögum við brotum á ofangreindum skólareglum er beitt eftir eðli og alvarleika brota. Ávallt er brugðist án tafar við brotum sem ógna öryggi nemenda eða starfsmanna. Skólareglur Holtaskóla erum byggðar á lögum um grunnskóla (91/2008) og reglugerð um ábyrgð og skyldur aðila skólasamfélagsins í grunnskólum (1040/2011) með frekari breytingum.

Stuðst er við eftirfarandi verkferla varðandi brot á skólareglunum:

1. Reglur um agaferla Holtaskóla.
2. Viðbrögð grunnskóla Reykjanesbæjar vegna ófullnægjandi skólasóknar nemenda.
3. Verklagsreglur um ástundun í Holtaskóla.
4. Eineltisáætlun Holtaskóla.

Skólareglur Holtaskóla gilda hvar sem nemendur eru á vegum skólans, í kennslu, á skólaskemmtunum, á skólalóð, vettvangsferðum, í félagsstarfi og á ferðalögum.